

COLUMNA

Chadafö – chà da fiu

AITA DERMONT-STUPAN

Ussa sun jau qua, la damaun en chadafieu che jau sufl en pigna. Ma jau na pens u na di betg: «Suffa en pigna», sco quai che jau di bain er mintgant, cur ch'i ma tanscha ed i na vala betg la paina d'insister u da s'agitar.

Sche jau sufl en pigna, fatsch jau quai cun tutta premura e concentraziun: tir ferm il flad e sufl ora precaut, ma intensivamain cun tutta speranza che la flommina da la stalizza giaja vi e tschiffia l'astella u il romin setg... Jau respir anc ina giada e sufl e guard e taidl, fin ch'i cumenza a schluppinar.

Mintgantant pari bunamain ch'i bastia be mia preschientscha e mes flad per ch'i piglia fiu. Sche jau crai numnadamain be da bittar en il zulpin e culs emprims schluppins serrar vi in pau l'isch ed ir suenter ad insatge auter, poss jau esser segira che la flommina sa stizza puspè. Jau prend propi peda e na bandun betg la bucca pigna avant che las flommas na cumenzan betg a sa trair si vers chamin magliond la laina.

Savens ma cumblid jau anc in mument en paratgs, admirond la forza e las colurs dal fiu, e bad



lura che las flommas han empizzi er mes tscharvè e che mia energia cumenza a girar. Jau ser la fora pigna, stun si, fatsch giu ils mauns vi dal scussal e cumenz mes di.

Il fim passa tras il chamin da la pigna sut l'arviet da la chadafieu via, fin vi e si per il chamin e derasa spert in chaud agreabel. Ussa sai jau pertge che jau hai fatg fiu: per avoir chaud.

Chaud? I ma vegn bunamain da rir. Chaud pudes jau avoir er pli simpel. Sistems da stgandar senza laina datti avunda. Mintgin ha oz sia abitaziun stgaudada, e quai enfin l'ultim chantun e be cun smatgar in nuf. Jau vom dentant anc adina purtond laina.

Pli tard ma met jau vi da far fiu en platta per cuschinar. Puspè far fiu.

Plaunet ma dumond jau: Pertge fatsch jau quai?

Sche jau pens tge lavur che quai dat. Lavurs che jau na dumogn gnanca da far mezza: Resgiar laina, manar laina, sfender laina. Per tut quest dovr jau maschinas che fan anc in detg viers e dovran energia e glied che ma gida.

Pir lura cumenza per mai la lavur recreativa da strair la laina en bargia, far stgandler, per la prender pli tard mintga di puspè giu dal stgandler e la purtar en chadafieu ed arder. E fim. E tschendra. E fulin sin las curunas. Fiss ura da dar giu alv...

In architect m'ha mussà ina giada ina chasa veglia ch'el ha renovà: «Ussa stos guardar la chadafieu!», ha el ditg intgantà. «Jau l'hai lasheda sco quai ch'ella era, tut naira.» Jau hai guardà enturn. I na guardava gnanc ora mal. Cumbinà cun mobiglia, materials ed apparats moderns... però...

«E la platta da fiu e la fora pigna?», dumond jau. – «A, quai na dovra naging pli.»

Cha(dafieu) naira senza fiu.

Aita Dermont-Stupan da Sent è stada u è anc adina magistra, pastra, translatura, redactura, mamma e tatta – e columnista.